



PORTAVÓS VI GOVERN U KONSTITUSIONÁL



KOMUNIKADU BA MEDIA

Díli, Loron 19 fulan-maiu tinan 2017

Governu organiza selebrasaun sira ba Aniversáriu Restaurasaun Independénsia nian da-15

Ho ponteiru relójiu nian ne'ebé hatudu loloos ba kalan fahe-rua (meia-noite), momentu ne'ebé marka ona ba restaurasaun Independénsia Timor-Leste nian to'o ona. Iha loron 20 fulan-maiu tinan 2002. Ema hotu halibur malu hodi selebra rohan husi Timor-Leste nia luta ne'ebé naruk ba autodeterminasaun no fó sai ba mundu tomak Restaurasaun Independénsia, ne'ebé proklama ba dala uluk husi Francisco Xavier do Amaral, iha loron 28 fulan-novembru tinan 1975.

Iha loron 20 fulan-maiu tinan 2002 ne'e, sorumutuk boot liu hala'o iha Tasi-Tolu, iha Dili, iha ne'ebé hala'o serimónia ofisial ne'e. Bainaka sira husi rai-li'ur mai hamutuk ho dirijente timoroan sira no sidadaun rihun ba rihun ne'ebé kontente tebes-tebes, atu selebra no fó onra ba momentu istóriu ida ne'e.

Tinan sanulu-resin-lima liu tiha, selebrasaun sira ne'e hala'o fila-fali iha Tasi-Tolu, iha ne'ebé, simbolikamente, iha kalan fahe-rua Francisco Guterres "Lu-Olo", sei simu pose nu'udar Prezidente Repúblika Demokrátika Timor-Leste nian dahaat.

Governu, liuhusi Ministériu Administrasaun Estatál, organiza ona progama ida kona-ba eventu sira iha loron balu nia laran, atu komemora Loron Nasionál ne'e, ne'ebé hahú iha loron 18 fulan-maiu, dadeer, ho misa ida. Iha loron 19 fulan-maiu programa ne'e kontinua iha Tasi-Tolu, husi tuku 6:00 to'o fali tuku 6:00 loron 20 nian. Iha loron hanesan, sei hala'o Serimónia Hatuun Bandeira iha Tasi-Tolu, iha tuku: 16:00. Inaugurasaun ba estátua Proklamador Francisco Xavier do Amaral nian sei hala'o iha fatin ne'ebé besik odamatan tama ba Sentru Konvensoins Dili nian, iha loron 20 fulan-maiu, husi tuku 15:30 to'o tuku 19:00

Aleinde selebrasaun sira ne'e, sei hala'o mós konferénsia internasionál boot ida iha Sentru Konvensoins Dili, ne'ebé sei ko'alia liu kona-ba Ajenda tinan 2030 Nasoins Unidas nian, ho tema "Roteiru ida ba ODS iha país frajil sira no Estado sira ne'ebé afetadu husi konflitu" [iha loron 22 no 23 fulan-maiu]. Iha loron ne'e mós sei hala'o mós eventu tolu: "Diversifikasaun ekonómika iha era ODS nian" [loron 21 fulan-maiu], "Saúde iha era Ajenda tinan 2030 nian ba Dezenvolvimentu Sustentavel – Programa Saúde iha Familia" [loron 23 fulan-maiu] no iha tempu hanesan sei hala'o mós eventu ida kona-ba Objetivu 14, Preteje Moris Tasik (Vida Marinha) – Konservasaun no utilizasaun sustentavel husi tasi-boot [oseanu] sira, tasi no rekursu tasik sira ba dezenvolvimentu sustentavel [loron 23 fulan-maiu].

Relasiona ho aniversáriu Restaurasaun Independénsia nian da-15, Portavós Governu nian, Ministru Estado Agio Pereira, hateten katak "iha tinan sanulu-resin-lima ne'e nia laran, Timor-Leste hametin ona pás, harii instituisaun Estado nian, harii sistema saúde no sistema edukasaun nian ne'ebé so'i ba populasaun tomak,



Agio Pereira
+670 7723 0011
agio.pereira@cdm.gov.tl
govtlmedia@gmail.com
www.timor-lesste.gov.tl

harii infraestrutura importante sira no hadi'a duni buat lubuk ida ba ita-nia povu nia moris-di'ak. Buat hirak ne'e hotu iha nasaun pós-konflitu ida, ne'ebé bele dehan tenke hahú husi zero, moris fila-fali husi ahikadesan hafoin tinan 1999. Daudaun ne'e ita selebra Loron Libertasaun nian, ne'ebé ita-nia maun no bin sira alkansa tiha ona, ita ható'o benvindu ba ita-nia Prezidente foun, ita halo reflesaun kona-ba jornada ne'ebé ita halo to'o oras ne'e no ita sei asume kompromisu atu kontinua harii no serbí ita-nia Repúblika Demokrátika Timor-Leste, independente, ne'ebé ita hadomi!" **REMATA**

